

三台縣志卷十一

人物志六

賢婦

後漢

文極

〔華陽國志〕文極字季姜梓潼文氏女將作大匠廣漢王敬伯名

堂夫人也少讀詩禮敬伯前夫人有子博女紀流二人季姜生康稚芝

女始示凡前後八子撫育恩愛親繼若一堂祖母性嚴子孫雖見官二

千石猶杖之婦跪受罰於堂歷五郡祖母隨之官後以年老不願遠鄉

里姜亦常侍養左右紀流出適分已侍婢給之博好書寫姜手爲作袞

劉李本作表舊縣志作袞

於是內門相化動行推讓博妻健爲楊進及博子遵婦蜀郡張叔紀服姑之教皆有賢訓號三母堂亡姜勅康稚芝婦事楊進如

三台縣志

卷十一

三台新民印刷公司代印

舊姑中外則之皆成令德季姜年八十一卒四男棄官行服四女亦從

官舍交赴內外冠冕百有餘人當時榮之王氏遂世興常璩讚曰季姜

雍穆化播二婦王氏世興實由賢母

楊進

〔華陽國志〕楊進武陽楊氏女大匠廣漢王堂長子博妻也博後

母文有母儀之德進楊則其教爲行閨門雍穆梓柯太守李禕家每不

和歎恨徒富貴學問不及博家也讚曰進楊穆穆先姑是憲

張叔紀

〔華陽國志〕張叔紀張霸女孫也適廣漢王遵至有賢訓事姑

以禮生子商海內名士廣漢周幹古朴彭緄漢中祝龜爲作頌曰少則

爲家之孝女長則爲家之賢婦老則爲子之慈親終溫且惠秉心塞淵

宜諡曰化明惠母讚曰叔紀婉婉十媛仰風

晉



李秀 〔華陽國志〕李秀毅女適漢嘉太守新都王載有才智父亡後州文武推領州三年

唐

何皇后 〔新唐書后妃傳〕昭宗何皇后梓州人帝爲壽王后得侍婉麗多智恩答甚厚既卽位號淑妃從守華州詔册爲皇后光化三年劉季述挾德王陳兵脅帝內禪后恐賊臣加害天子卽取璽授季述與弟同幽東宮賊平反正天復中從帝駐鳳翔李茂貞請帝勞軍不得已后從御南樓會朱全忠逼帝東遷后謂帝曰此後大家夫婦委身賊子矣涕數行下帝奔播既屢威柄盡失左右皆悍逆庸奴后侍膳服無須臾去側至洛帝憂忽忽與后相視無死所已而遇弒哀帝卽位尊爲皇太后徙居積善宮號積善太后帝將禪天下后亦遇害初蔣元暉爲全忠邀

三台縣志

卷十一

二

三台新民印刷公司代印

九入錫噓后度不免見元暉垂泣祈哀以母子託命宣徽使趙衡譖於全忠曰元暉等銘石像瘞積善宮將復唐全忠怒遂遣縊后以醜名加之廢爲庶人〔資治通鑑〕乾寧四年十一月戊寅立淑妃何氏爲皇后后東川人生德王輝王

〔陳謙弔何皇后詩〕定策國老恣無忌更有強臣暗窺覬內憂外患迭相乘回首殘唐堪流涕大權旁落歸藩鎮九鼎敢於天子問挾帝蒙塵屢播遷弈棋未終置不定紇干山頭凍煞雀縱復有生亦何樂可憐虎口寄昏朝把缺悲嗟淚雙落積善宮中位已禪得保餘生卽至願寡婦孤兒仍弒之朱三老賊眞萬段荆棘長安塞不開故鄉無復翠華來國破家亡朝代改日暮西風梓水哀

王氏

〔舊唐書列女傳〕王氏魏衡妻梓州郪人也武德初薛仁杲舊將



房企地侵掠梁郡因獲王氏逼而妻之後企地漸盛衡謀以城應賊企地領衆將趨梁州未至數十里飲酒醉臥王氏取其佩刀斬之攜其首入城賊衆乃散高祖大悅封爲崇義夫人捨衡同賊之罪〔通志原按〕王氏新唐書列女傳刪之而附見於薛舉傳豈以其失身故耶然卒能手斬賊首較晉書列女傳載王廣女事閭繫梅芳而不中者爲大快也故仍錄之

宋

薛氏蘇易簡母〔宋史蘇易簡傳〕易簡參知政事上召薛氏入禁中賜冠帔命坐問曰何以教子成此令器對曰幼則束以禮讓長則教以詩書上顧左右曰眞孟母也

杜氏蘇舜欽妻〔一統志〕舜欽謫宦死杜布衣蔬食居數年挈其孤子

三台縣志

卷十一

三

三台新民印刷公司代印

斂其生平文章號泣奔告於其父曰吾夫屈於生猶可伸於死衍因請歐陽修爲序其集而傳之〔宋史蘇舜欽傳〕舜欽娶宰相杜衍女杜氏有賢行

清

盧氏 胡文恕妻文恕父爲景將軍記室駐防古州文恕往省父旋補營弁因娶氏焉嗣父沒胞兄文瓊往弔亦死於古後十餘年謀返蜀遂檢父兄骸骨歸葬行至龍里氏與夫失道遂獨負三千餘里九越月抵家遠近異之

許氏 劉照南妻翁逾八旬體弱多病氏煎藥調羹周旋奉養月餘未安枕翁姑憐而慰之氏無德色無怨言爲媳二十餘年族戚賢之

林氏 邑北訓導謝紫垣州判煒堂之母翁被牛觸仆林氏奮不顧身拒



而撐其角始解藍逆犯潼被難城中率諸女至井邊指曰城破此吾與汝死所也豈可受汗辱乎

歐氏 秋林驛張疇五子婦少時躬汲井以養親今百餘年泉盛可以溉田里人比之漢姜詩孝泉云

魏氏 李榮翰繼室性和而孝善承翁姑歡翁姑愛之常呼爲魏三姐翰弟兄四人已行三嘗僦田耕未數年資本失厥後析居弟兄各分餘資數百緡翰因失資不預臥牀泣魏慰曰泣何爲者遂同叩翁姑婉言得貲二十緡再婉言得四十緡魏又語翰曰君無憂不數年當爲君積貲置業翁姑見其勤儉非常亦曰將來興家必魏三姐也道光中葉魏果陸續置產數百餘畝囑其收租雖豐年必讓及典戶送穀來仍令各持數斗歸典戶曰已承讓矣魏曰此爲吾子孫留福無容辭務持去

三台縣志

卷十一

四

三台新民印刷公司代印

李氏 北京人王謙六之次妾無子撫嫂梁氏次子格非嗣謙六家富卒後迎好者絡繹孺人慨然曰是豈處家之道乎聽其分爨產業器物不及半毫不介意挈格非遷居邑西松莊焉時格非十九歲驟然僻處意不樂孺人延親友與之遊戲越二載性少定乃趨於正晚年益自勵手置田數百畝牙籤數百軸製布衣一襲以終身

銀氏 王麒勳妻邑選拔肇慶女麒勳素剛嚴少違意呵責備至以故四十餘猶不敢出外戶治家維密半絲半縷無棄物慮事周至合家四十餘人曲體其意無毫髮憾每晨起至日夕紡績不倦人問之則曰人不勞則惰我吃着幾何將以習勞也族黨稱之

馮氏 危月鄉卿茂修造室孀無子氏生子四歸時拮据謀生茂修年四十餘卒因家故貧儻業而耕嘗爲田主所齧迨家裕告子孫曰吾後嗣



若駿佃民吾不福汝氏謹守此言常舉以誠子孫同治初米麥騰浦田主增租者攘奪不堪氏遵遺言不使其子加租佃

羅何氏 居南路斗星灣富而好施培修各廟毫無吝色及築萬福山寨捐金爲倡衆皆踴躍輸將寨益堅固前清首匪及民國匪搶劫各鄉此寨竟能保障一方皆孺人之賜也

羅氏 爲邑南處士羅世仲女幼讀女誠識大體歸唐理卿生七子殤其三現存四人皆崢嶸露頭角其長子玠尤知名氏訓子極嚴偶違教卽予杖篝燈課讀頗有丸熊風殆所謂義方成於母教也

武氏 邑北王在德之妻鄰族有不孝不弟不和睦者殷殷訓導人多悅服教子最嚴長子之藩入庠次子之綬入國學

謝氏 唐旭初之室能識文字敬事翁姑和輯娣姒撫子撫姪皆盡恩誼

三台縣志

卷十一

五

三台新民印刷公司代印

王叔貞 王高山之胞妹工詩事姑孝詠母病云醫言母病氣虛多醫方不效奈若何但願神天頻保護懶繡花鍼唸彌陀又七夕望夫云日暮風吹落葉多牽牛織女渡銀河閨中少婦倚門望一片愁腸對素娥

侯氏 緜東侯樂山之女年及笄歸縣北南溟鎮劉石卿爲室事孀姑盡孝以夫粗識文字勉以勤學晝則代夫振理家事俾得專心講習冬則爇火溫足暑則執扇驅蚊無怨無怠鄉人多以樂羊夫婦目之惜天不假年二十四歲卒

李氏 林先康妻先康幼時家小可旣而父母卒財產消耗流爲乞丐氏寧死不更字他人于歸後親友助資氏勤紡績先康造陶器家復小康氏年八十餘卒

張氏 歸許勃然初家頗清寒氏佐之恭謹勤儉有敬姜孟光風事姑陳



氏極孝每食必具樽酒以適其意姑年逾九秩以疾終氏哀泣如孺子嘗言未盡孝思於萬一氏無出旋撫胞兄次子元信教養逾於己出嘗節已飲食以隆修脯使就名師受業信亦性敏好學有文名入泮後旋食廩餼咸豐四年出恩貢氏時亦壽滿百齡湖北布政使蕭濬川幼居三臺曾受業元信門下及奉命入川勦賊適值氏誕登堂拜祝以頤慶經明題贈金儼堂作有七古歌以紀其盛

孝  
女婦

明

蹇氏 〔通志〕蹇氏潼川州舉人黃文麟妻事姑至孝麟甚敬禮之及卒母令再娶麟曰婦能體子心而孝吾母世所罕者即娶未必如蹇也

清

三台縣志

卷十一

六

三台新民印刷公司代印

李氏 楊子明妻母黃氏病篤亟歸寧願禱割股以進遂瘥後姑江氏嬰重疾李復割股療之姑病亦愈

楊西姑 邑人楊維寬長女年十八未于歸聞姑李病篤割股合羹遣人送夫家李食之病尋愈後李知其事即促子成婚婦入門喜形於色又一月病作笑語家人曰吾有佳兒佳婦可瞑目矣遂亡

謝蘊芳 南溪謝泰春女幼侍父任所聞學輒悟善吟咏性至孝父母病篤屢割股和藥以愈二親繼逝弟兄在籍獨任殯祭如禮年二十適華陽曾光照事姑亦以孝聞晚歲長齋禮佛爲姑乞壽謹身儉用多爲善舉以夫官山西知縣晉級封夫人年四十卒著有詩集

樊氏 樊世忠女王永川妻姑李氏病患癱樊以口吮之姑年老癱瘓衣食起臥皆樊左右扶持十年如一日父病篤歸省醫藥罔效割股以進



遂瘳

楊氏 王順映妻射洪楊芳春孫女幼聆彝訓頗知大義父光瀾疾篤割股和藥奉之獲愈及長適王因夫病危復割股療之

李氏 貢生羅鼎妻性溫雅知大義夫病篤割股以進遂愈

趙氏 趙芳藻女楊永慶妻生母丁病篤於夫家焚香禱告割肝盛杯中覆以藥物遣僕婦送母和藥以進母病頓愈趙亦無恙

楊氏 宋本中妻事翁姑以孝聞翁病危割腕肉調羹進之延數十日始歿及姑得足疾亦割腕肉進之賴以全愈初艱於嗣繼得二子夫歿能教子持家

陳氏 王體三妻性純孝未嫁時其母病危思食肉女泣祝竈前齧臂上一鬻烹而進之立愈後適體三家赤貧逮事繼姑如事生母焉

三台縣志

卷十一

七

三台新民印刷公司代印

羅氏 邑庠生張啟宇妻事舅姑極孝凡衣服飲食親爲檢點幼聰慧識字熟讀孝經每遇親鄰男婦必詳爲講解里中稱爲女師子文瑞嘉慶甲子舉人

陳氏 李成興妻姑患目疾陳朝夕以舌舐之十餘年不厭目漸復明後姑歿以哀毀卒

張氏 劉宏源妻事姑王氏甚謹年三十卒生紹文甫六齡王氏痛媳孝敬不壽乃存其釵釧俟紹文成立出而付之屬作蒸嘗勿使廢祀紹文積累至年九十始爲建孝感祠置祭田至今子孫書香濟美承祀不衰人謂孝德之報

〔陳謙孝感祠詩〕孺人純孝言無閒至性淋漓血一片姑婦相倚等駞驢跬步追隨弗忍遠丈夫未遇久食貧謹佐紡績供粥膳霜露忽摧孝



婦花姑爲失聲淚如霰婦之存姑所憐婦之歿姑尤念巾箱檢點舊時衣中懷慘怛增悲歎平生事我備艱辛忍使九原無麥飯苦心欲爲謀厥長以衣質錢得數貫貯待遺孤漸長成乃爲正告之曰此乃爾母之所遺尙其營厥蒸嘗修厥祭奠爾力克勤我心無歉遺孤受命兢兢戰戰以爲人心至此猶不知感發異日地下之遊阿祖阿母何以相見子母相權無滯留遂較家私過百萬寢成有灑祭有田莘莘俎豆何豐贍榜曰孝感誌厥初觀者流涕悲且羨遺孤曰此棖耶榭耶堂耶階耶非棖也榭也堂也階也乃阿祖之心阿母之衣兩兩相綴綻而今而後神明庶幾無恫怨吁嗟乎安得姑婦盡如斯斯世應泯勃谿患

陳氏 謝述明妻年三十一夫歿遺子一女二家窘甚陳以祖父老祖母瞽舅姑病風誓不他適朝夕奉養辦於十指無怨言逮祖父母暨翁姑

三台縣志

卷十一

八

三台新民印刷公司代印

歿衣服殯斂靡不盡心苦節純孝爲鄉黨所推重

張氏 劉剛梁妻年三十餘夫歿姑老家貧張傭工以養每得甘旨必歸遺姑竭力侍奉歷二十年無懈姑七十八歲卒張募衣棺營葬克盡禮焉

羅氏 羅汝揚女王協堂妻許氏楊其榮妻黃氏李遇泰妻均姑病危割股療之而愈（併新府志）

王蒲氏 因生母蒲楊氏病久不痊龔陶氏因其姑龔顧氏病重不起二婦均割股奉親皆愈

吳氏 涪城壩人宋乾霖妻家貧苦中年艱嗣矢以孝養清光緒丙申秋祖母病氣痛瀕危夜半焚香割股肉和藥以進痛卽止諱使人知卒後翁姑慟幾絕祖母撫柩言曰我吳孫媳死我不願生相從泉下得孫媳



侍奉足矣後祖母果日日減食未及半月終

陳敏宜 陳汝爲女隨兄問難識字漸多喜閱吳梅村詩瘟病流行母病瘟遂割股和藥以進病果愈字孫世彥先婚期而卒

陳氏 尾火鄉羅斗南妻清光緒初翁遘危疾時斗南遠出未歸陳氏躬侍藥餌焚香禱告百無一效遂割股和藥以進卽愈月餘斗南歸翁疾發旋歿越百日斗南亦歿

李氏 尾火鄉黎成果妻父李文欽病篤割股以進病卽愈

羅氏 邑南王行之妻父病侍湯藥日不交睫者四十餘日對竈焚黃願減己算以益父壽並割股以調湯藥病旋愈

吳氏 葫蘆溪鎮江壩貧民李某妻民國七年姑病歷久不瘳氏乃割肝以進姑病尋愈瘡口亦合縣佐陳瑞春歡迎入署驗明屬實獎勵有加

三台縣志

卷十一

九

三台新民印刷公司代印

梁氏 梁崇忠女年十五適孔斐然舅姑早歿祖姑蕭年八十五病篤氏割股和藥以進病若失子慶雲年十四亦割股以療母疾忠次女適張某未出閣時父病心氣痛醫藥罔效舉家失措氏剪股入藥劑進之竟全愈

武孝女 名紹靜貢生武含章第四女待字而父病風痺臥牀不能反側晝夜便溺二三十次孝女與其妹紹端躬侍左右凡湯藥飲食膾廁均身親之凡十一月均侍側不寢久之亦脊起骨立母因其病強之寢終不肯眠及含章卒兩孝女啼不絕聲病且劇越月紹靜死及斂乃見其左股有割痕家人驚驗紹端亦如之詢之紹端乃曰父病劇時聞割股能愈病姊妹因割肉爲湯以進幸少瘥又延二月餘父乃逝本不令人知奈姊先死而竟洩也紹端病彌留期年亦殞



魏氏 趙裕廷妻孀二年翁病三月不愈氏禱於竈願促壽延翁年繼又割臂肉和藥以進疾平祕不言年三十歿

陳氏 廩生趙用賓之母姑病篤氏割肉和藥以進又祈減己壽益姑姑年至九十八病危時歎曰兒孝不如媳孝光緒十年府學易象離以孝思不匱題贈

鄧氏 劉正盈妻生母徐病危氏割股啖之病尋愈

楊氏 射洪進士張堯燊妻剪臂肉痊姑疾原住三臺城內新西街現年五十九

韓瓊芳 文生韓國彥女幼讀書寡言笑年十四母氏趙病數月女禱於神割股和藥以進母病旋愈

蔣氏 邑西處士謝彩坤之妾年十七歸謝性純樸事姑孝民國戊辰秋

三台縣志

卷十一

十

三台新民印刷公司代印

姑年七十病篤醫藥罔治氏聞格言中有割股療親疾事遂潛拜先靈割膀上肉祕烹奉姑姑食之病果痊健倍於昔後因傷痕過重延醫治之家人始悉其故鄉人聞之無不汗顏而贊許之

楊氏 室火鄉諶世耕妻光緒丙午世耕病篤醫藥罔效楊氏祝神割股肉調羹以進其夫食之尋愈其後翁鳳樓病危氏復禱祝割左股肉烹以奉翁病亦隨瘳其誠孝之心如此

林氏 邑南室火鄉庠生李炳麟妻年三十六夫亡姑汪氏多病氏奉之極孝姑旋患風癱四肢不舉飲食起居賴氏扶持時爲姑洗滌廁踰不避穢數十年如一日戚鄰莫不以孝稱之其子國霖國經教養成立家業漸興咸謂孝道之報云

貞女



陳淑貞 邑人陳玉品次女幼許字張翰文之子尙未完配嘉慶五年教匪過涪江翰文父子避賊去不知所終後玉品夫婦亦相繼死女守貞不再字布衣茹素足不出閨闈諸父陳玉瑞欲奪其志女自經遇救得免族黨鳴於官答玉瑞而旌其門

冷二姑 邑人冷純書妹少多病事父母以孝稱父歿時年已三十餘遂不字依兄嫂以居至六十三歲卒

李冬姑 邑人段元常養媳年十五未婚咸豐十一年夫爲藍逆擄去死賊中翁欲奪而嫁之不從聘者訟之官仍不從訊所以曰志在守節諭令歸翁怒不給食乃大歸母家亦貧甚同里楊炳坤哀其志爲釀金取息以養同治十年以病卒歸葬夫家遠近觀者數百人

〔附陳謙詩〕一穗寒燈悄無語我爲歌傳李貞女人云貞女金石堅誠

恐金石堅莫比貞女生從貧困家凜然一樹寒香花嬌小無倚適段氏語言莊重貌柔嘉伯姬從來女不婦待年久向閒房住逆匪掀天動地來夫被擄亡不知處雙眼懸懸望其歸自春阻秋黃葉飛忽聞凶信自綿落家人疑是女疑非從此守貞意已決利觸難解同心結翁也天只不諒人掠貿易等金陵妾女聞號咷悲不止我之所遭乃至此倘教改節適他人九原何以見夫子油碧轎輦駕輕車彩燈紅映野人家豈知勁挺湘江竹不比飄揚道上花勢窮無計惟奔月複壁臺卿摻不得狂且速訟到公堂柔質何難任挫折持正非關賦性剛峻詞抵拒劍生芒官曰此節不可屈放爾枝梢萬仞長都人歡騰稱厥義不謂反失姑舅意禍胎久養終何益飭粥藿藜不能繼女有祖翁貧且老供膳僅能自爲保強爲收卹使扶持未幾一病歿秋草煒煒獨立哭向天軀微已分



溝壑填猛虎當門去無路大歸仍倚阿孃邊萬物惟誠爲能動况此艱  
貞殊邁衆聞者悲啼見者憐解囊傾囊爭餽送食貧作苦幾昏朝門閉  
重閨髮兩髦仙子何堪久塵世金母雲輶已暗招辛未六月忽抱病歸  
決舅姑淚如綆生不能事死何能此事此生兩遺恨可憐狐死仍首邱  
會喪親致古諸侯上書煌煌邀天語恩綸下慰寒泉幽君不見貞之同  
室從母謝孀媪夫同被擄埋荒陬撫孤苦節不肯嫁將與此女傳千秋  
節婦段金氏段智昭媳爲貞女  
從叔母夫亡時年才滿二十

葛貞女 邑南樂嘉場李安卓次子臨讓聘定妻將婚臨讓卒女往弔遂  
請於夫家守節柔順孝謹祖姑絕愛憐逾六年以病卒鄉人義之同爲  
旌表

〔附陳謙詩〕嫁夫守節世多有未嫁夫亡誰爲守葛家女兒見義貞隨

三台縣志

卷十一

十二

三台新民印刷公司代印

俗待身無乃苟一與之齊終不改在室亦屬名分在况乃納采兼聞名  
鐵案已難移山海妻道臣道本一致我命終爲彼所制未恩亦與受恩  
同何論衆人及國士在途夫家病不起女子亦有奔喪禮世俗澆漓古  
道衰反謂矯情乃如彼貞女何能知其故血性從來天所賦夫亡往弔  
竟不歸無子居然有子婦安而行之得所止茹蘖飲冰及於死此意不  
以存亡殊同時又有城中樊家姑

羅二姑 邑人羅輔廷次女幼喜讀訓女遺規事親承奉惟謹有問名者  
二姑不欲曰吾將事祖及父母以終也父母及祖察其誠因亦安之演  
匪亂祖居砦病甚二姑割股療之遂瘳

張貞女 邑人張福成女幼字陳鳳高次子思超咸豐辛酉春滇匪入境  
張送女於陳爲養媳三月陳率諸子隨團衆禦賊於秋林驛思超死之



明年賊平人聞女賢餽父以利因偕媒灼詣陳索女女聞閉戶自經衆破窗入救獲免父與翁姑知不可奪爰卽爲立嗣以成其志後姑病劇思肉女調羹以進病越瘥數月翁病亦劇女奉肉羹進亦瘥皆未究其肉所自來同治戊辰女寢疾卒沐其屍見兩股傷痕乃知曩日肉羹實其割股所爲云

蕭世鳳 城南關外人幼得目疾守貞不字年七十卒

高長姑 邑人高大珍女少得羸疾矢志不字年至六十未與男子交一言

秦貞女 邑人秦小芝女幼字李永棠四子紹梁未婚而紹梁歿女泣請於父母願奔喪爲李家媳父母察女意誠商於李李許之遂衰絰往奠葬畢女不欲歸翁姑與約曰待吾三子生孫爲梁立後可來撫子以守

三台縣志

卷十一

十三

三台新民印刷公司代印

女諾厥後有孫將爲立嗣乃迎女爲女事翁姑以孝謹聞壽七十餘歲

以上併府志

〔知府楊玉堂秦貞女詩〕冰梅不知春耐冬不知暑寒香歷萬劫幻作女貞子牽以女蘿絲絲斷心相許天桃未放花孤根託芳李情以義糾結朔風吹不死登堂盤椎髻花任合歡委明月照孤幃薄命怨誰使枯木春不華井水波不起湛然冰玉光芳馨襲蘭芷

〔蕭鴻吉詩〕生不識郎君面死願作郎家鬼君看十餘齡錚錚奇女子女子誰姓秦氏采綠吟詩學秀蘭定婚有帖書仙李仙李蟠根日月長百歲和鳴卜鳳凰紅錦乍思春奠雁青楓忽報夜催霜一生一死人情見鐵石芳心終不變手製麻衣當嫁衣人呼淑媛爲貞媛魚菽親擎荐几筵韓童墓上慘雲天不是舅姑雙慰藉多應紫玉化成煙空房歸守



郎君宅鏡中膏沐容誰覲約髮仍縮女兒笄點黛未經夫子筆九死無  
生怨結襦一坏矢志期同穴但知天地有綱常豈爲姓名標綽楔  
〔秦寧村題猶女瑞蘭貞節詞〕怪鴉叫不休少女坐翠樓不聞刀尺聲  
惟聞泣唧啾問女何所泣問女何所愁女別無所泣女別無所愁昨見  
婆家人來書付爺折折看是凶書書中字字血聽說薄命死一慟幾欲  
絕生未識君面死未與君訣願離爺孃去一哭與君別頭拔碧玉釵耳  
脫明月璫腕除金纏臂面濯脂粉香朝辭爺孃去暮登翁姑堂不聞翁  
姑喚兒聲惟見新婦麻衣獨立拜姑嫜夜宿白羅帳曉參竈廚前不聞  
翁姑喚兒聲但見庭燭紅淚流涓涓生是君家人死是君家鬼欲爲程  
嬰生地下負夫子欲爲杵臼死何人奉甘旨兒讀烈女箴頗識烈女心  
心堅比金石金石可磨心不變死人不見生人見三朝回門禮兒身自

三台縣志

卷十一

十四

三台新民印刷公司代印

主張慷慨告翁姑謝罪辭爺孃朱履三千客金釵十二行諸親作盟證  
瑞蘭不願還故鄉願效雪梅商家婦白首奉高堂翁姑聞女言破涕轉  
爲歡哥嫂聞姊言嘆息語辛酸弟妹聞嫂言揮手淚灑紅欄杆出門語  
諸親諸親皆歡舞旣作未亡人猶是守貞女破鏡不望圓甘荼不知苦  
三載始歸寧除髮見父母父母心喜極翻惹淚漣漣謂汝同胞共五人  
汝是吾家女白眉面似寒梅色心如古井水寒梅無冶容井水波不起  
姑家與孃家節孝兩盡美貞女莫患守無孤螟蛉尙有仙根李

秦氏 貞女之姪名鳳止字唐心朗楊氏楊賀廷女字黎天銳俱過門守  
貞撫子存祀

武貞婦 邑南翼火鄉李光儒長女也幼嫻詩禮字同鄉武錫堂及笄未  
嫁而夫死訃至請於父母歸武氏服喪父以武貧阻之誓死乃許素服



往哭弔執婦禮隨姑操作母迎再三不歸有富家子聞其賢請婚於其父父使其叔母告之貞婦舉剪刺頸得救不死父見志堅乃已舅姑女蓄之舅沒姑病瘁且瞽凡六年貞婦先意承志奉侍湯藥踰廁皆躬親焉姑臥病若忘撫子紹文上其事於朝獲旌建坊并祀本縣節孝祠牛雪樵廉訪筆其事於聞善錄

徐氏 危月鄉人清廩生徐代鴻女幼字張氏子因家寒未及笄即童養舅家婿年十六從軍不返姑及祖母憐其在室而嫠欲改字之女不可遂成其志

張志芳 小字紅鸞張慎言女畢月鄉人性慧善讀九歲母卒兩弟稚女力任浣紉父鑒於黑心符不肯續娶而一病幾殆女焚香竈前乞以身代謂父再不諱則諸孤命休矣父痊女司出納分父內顧憂嗣有聘其

三台縣志

卷十一

十五

三台新民印刷公司代印

父慕遊者女知不可阻而悽戀萬狀背父徹夜泣父行而女病遂不起年甫十八葬後墓上忽叢生異草白華紅子里人名其草曰紅姑孃王鳳英 尾火鄉王裕信女父母早逝無子鳳英守貞持齋奉佛撫堂弟承祧并爲之娶婦嘗謂人曰吾之貞不字不過爲父母續禮祀行吾心所安耳

王六英 尾火鄉王泗亭女言笑不苟守貞五十六年疾卒

鄧智蓮 嵩火鄉人父慶瑚母氏童多疾智蓮屈意承歡不願適人以故父母愛之親歿事兄嫂如事父母數十年無間言年六十卒

葉氏 亢金鄉人葉開國之祖姑其父生二女長已于歸次女見父無子抑鬱成疾常慰之曰兒雖女流亦可當男子甘願不字在家奉二老至百年足矣嗣後父遂撫孫承祧女送二老歸山後即坐守清齋年六十



餘卒

羅全貞 邑南羅世卿次女性貞靜喜讀訓女遺規幼字陳啟珠之長子  
光拔未婚而夫歿誓不再字請於夫家過門守貞前清旌表卒年五十  
一

李氏 李懷功之三女幼字房日鄉富紳王政典及親迎日政典重病不  
起輻至壻門導女至牀前面見焉壻一痛而絕女痛哭失聲族戚哀悼  
婉從其志

張玉貞 軫水鄉張正惠女幼字王永璋年十六病故女十八歲聞訃慟  
絕父母撫慰再三欲改字豪門不允姑姊妹多方苦勸亦不允父母無  
如何乃爲具衰經麻衣葬夫日往弔對靈加笄哀感路人此光緒乙酉  
事也服闋終身不御華飾閉門看書讀列女傳以自勵撫胞姪爲後

三台縣志

卷十一

十六

三台新民印刷公司代印

劉貞女 劉煜秀女幼字陳宗耀成婚有期而宗耀歿女聞耗欲往弔家  
人堅阻遂偕母至夫家服衰經哭泣葬後舅姑及母俱勸另嫁女矢志  
不從堅守四十餘年未嘗與男子交一語卒年六十八

歐陽春蓮 歐陽華年長女幼字李藩昌粗通文字喜讀曹大姑書年十  
八昌亡春蓮聞之痛絕不進飲食者三四日家人疑爲病後始知欲過  
門守貞晚母弗許屢欲逼嫁女自縊賴弟裕興救得免年二十六卒於  
家後乃翁李樹人得其情爲春蓮撫嗣立主并遷與藩昌合葬焉

劉姑 城北關外人年及笄夫陳歿於水劉姑聞之向母泣訴欲往弔不  
許劉姑力請遂匍匐奔喪留陳門不歸願終身守貞其姑黃氏以家貧  
恐難終志勸其改適劉姑以死自誓撫子承嗣日侍姑側未嘗遠離存  
年五十八



王祿貞 邑南王裕陞女年二十六以父年老無子守貞不字民國八年裕陞被兵掠搃拘押觀音橋店祿貞朝夕依父日不食情急莫何遂咬指血書有冤難伸四字於店壁閉戶自縊上下衣服用麻線密縫知事羅鼎新廉得其情旋飭刑作檢驗父冤乃白所可異者祿貞於七月自縊至八月開棺勘驗相去半月之久面貌如生其精誠不死良可欽嘉知事乃通稟上峯督軍熊卹龍洋二十圓縣知事羅鼎新題贈烈比緹縈匾額又知事陳瑞林題贈一聯云拚將鐵白滌冤情是孝義所關應同道學先生直爭取山間明月○附近有明居寺要以金繩開覺路這神功莫測休怪觀音大士不肯分橋上慈雲場有觀音廟並立石道旁題曰王祿貞救父致命處

李迎春 李萬斛女性端慧年十七居兩河口市廛有狂且挑之弗動竟

三台縣志

卷十一

十七

三台新民印刷公司代印

造蜚語女聞投繯卒市人豎碣以紀其事

王貞女 觀音場王國耀女幼字陳光遠陳家頗饒婚期將及病殂計聞父母不令女知女覺詰得實痛苦至廢眠食父就榻慰以另嫁女不可以奔喪請父又不可女以死自誓乃備扈從送女至壻家設木主成禮後欲撫夫兄子爲嗣而夫兄百般抑勒女受挫折辱不可言狀投池自盡被救得蘇後乃撫其子以承祧

陳王氏 城內陳久良之聘妻幼貧爲刑吏陳某童養媳陳某命以兄妹相呼久良年十五赴蓉學商數年無音問女年逾二十陳某以其未婚欲還女於母使另擇壻女聞白於翁姑曰兄不歸兒之命也若歸仍爲翁姑媳不歸則爲翁姑女願終身焉陳某察其志無他乃聽之陳某撫族人子爲後翁姑歿女爲夫弟娶婦生子卽撫其子以嗣年七十二卒



烈女

明

錢汝吉二女 潼川州人長菊秀年十七次粉嬌年十五俱殊色天順間賊首吳升掠鄉市汝吉遇害二女抗不受辱投涪江死

劉賽姑 潼川州人劉嘉雄女正德間流賊肆掠賽姑逃匿於大獲山賊搜獲寧死不辱賊怒斷其手而去 並一統志

清

樊雪英 樊鍾玉女字中江程聖任未婚夫亡誓不再字夫父知之請仍歸其家學博羅從新助其妝知縣王宮午以冠帔及儀衛送囑中江令亦以儀衛送時以為榮

王滿貞 邑南鄉人字戴氏子為室將婚夫亡父母欲別字女不從遂自

三台縣志

卷十一

十八

三台新印刷公言代印

刎血跡瀝夫柩前鄉人異之白於官知縣王宮午使兩姓合塚親馳祭奠遠近來觀者數千人 並新府志

〔知縣王宮午撰貞烈合傳〕曾子問取女有吉日而女死如之何孔子曰齊衰而弔既葬而除之夫死亦如之亦如之也者服而弔焉云爾非謂既葬而亦除也其服奈何斬衰而已矣其弔奈何奔喪而已矣古禮女子既嫁夫死不得復返父母之家詩所以歌遠父母兄弟也既服之弔之矣焉有弔而反葬而除者然則奈何婦人無二斬終之而已矣其不得終也死之而已矣蓋明示夫婦名分一定不可易不明著其禮於經者知服之弔之終之死之之難不欲禮之有所窮此無體之禮不言之教也誰實知此者嗚呼我三臺王滿貞侷乎遠矣烈女為縣民王正安女幼慧貞靜寡言笑諸兄讀書嘗就問字義聞輒不能忘字縣民戴



清明之第六子安品爲室已卜吉而安品以暴病死是爲同治八年十二月十七日時女年十九聞訃一痛幾絕嗚咽哭不能已請奔喪父母不許則又哭父母不知其終能以死從也勸慰備至是月念三日爲夫死之七日夫家將以是日葬女哭不食且六日矣知父母必不能從其志於葬夫先一夕爲四簋酒一壺觴其父母曰父母愛兒故不令兒奔喪也兒故與若無夙緣且兒年亦太穉日月方長強爲之且貽父母憂兒聞命矣請爲父母壽願自今以後無復言戴家事也父母喜各進數杯女亦自飲一大白侍父母寢歸杯盤於廚焚香竈前入室掃地極潔易素服括髮以麻母固與女同室微聞聲問之曰換衣澣濯耳夜旣深母以其猶未寢怪之問不應視几上燈熒熒如豆心惶駭急起女已絕於地疑其中魔也拽之不起則抱之而號視其左手有刀方知其刎也

而地下殊無血痕母抱之大痛父若兄聞之亦起蓋女死已逾時矣是夜大風夫家屋瓦震動安品棺亦格格作聲良久乃已戴家長幼賓客咸聞之天明起視柩前有漚血甚多大者如錢小者如指殷殷然未乾也衆客聚觀而不知所自來方錯愕間鄰里譁傳女已刎頸死少頃王家凶信至嗚呼可謂烈矣初戴安品之母先安品卒女素服期年縉紳先生稱爲知禮其聞安品之喪而哭也已必有殉之志以爲父母庶幾而悟得遂其志則壻死而不死也至壻葬不悟斯不悟矣又慮父母防之壻葬且不得卽死也乃破涕爲笑以父母之慰已者轉而慰父母俾無所疑可謂從容就義者矣自古忠烈之至者其精誠所結足以格天地而泣鬼神仿徨鬱勃之旣深卒賣志以殉其浩然之氣無所伸則終必發洩於肢體糜爛之餘而不可以常理測故有血化碧者矣有血上



流者矣有血成篆字者矣有血入磚石成人形磨不滅煨益顯者矣未有噴薄於十里之外而刎頸之地無點血者其精誠爲何如設令委曲以成其志移殉節之精誠爲堦立後丸熊而教之造物必以奇福酬其奇節惜乎父母不知所以愛之也嗟乎禮教陵夷儒冠矢口談節義洎乎臨難則叩頭於草竊流賊以偷生閭閻者流往往拜於堂見於廟膠漆魚水不足喻其歡一旦永訣夫屍未寒弔者在門而賀者已在室人亦視之若宜然而何有於未嘗合巹者烈女以爲不若是則天軸絕地維折人類滅毅然死之甘焉如飴益以歎其生也有自來故直情徑行卒於無體之禮不言之教相脗合也予旣爲之合壙且上其事而同時又有程樊氏過門守貞一事貞女樊雪英者邑民樊鍾玉次女也聰慧粗通文墨有果斷才不喜作模稜語佐母操持家政井如也八歲時許

字中江民程孔修長子聖任爲室父固與孔修有舊故堦家事女稔知之歲己巳年十七受聘且九年矣是年九月堦聖任病歿女聞之哭甚哀母慰藉之且曰夫婦以人合者爾婦人固無再醮理然世之再醮者且不可更僕數矣况兒未婚猶女也可另擇配勿徒自苦爲女聞之哭愈痛不能作一語旣而曰母竟以兒爲何如人兒知從一終耳父母之命媒妁之言天地祖宗實憑之親戚里黨實知之兒不能以身死易也母無以對自是易素服衣帶之上色者不著於身陰察堦葬期而距堦家且一百二十里而遙堦旣葬女始聞之則大痛請於父母曰兒之不奔喪者父母實誤之兒之翁固三子堦歿已弱一个矣一出繼爲叔父後一未免懷兒欲代堦承歡以慰翁姑卽以慰父母今堦已葬矣如此遷延欲何爲兒無死所矣父韙其言而難之曰此兒一生事未可草草



會與而翁長計之女聞意稍安父與程商程喜甚父母終難之居無何有勢利子將爲女作伐謂是陝西富家子今已納粟爲道員行且來府父母無所可否女偵知之遂與其父決曰斷鼻截耳兒稔能之恐貽父母不韙名故不爲得毋慮兒末路之難否然此心已如死灰不可搖必欲奪此志請輿襯來毋謂兒不孝矣語且哭聲甚厲媒聞之懼踉蹌走事遂寢三臺教諭羅偉臣微聞其事詔女父鍾玉曰若女將過門守貞久未遂其志有之乎鍾玉唯唯具道其事甚悉且以窘狀告偉臣曰易事耳荆布值幾何不聞烈女王滿貞耶此一邑之光非爾一家事遲且有變乃助以青蚨二十緡且謀之予予曰嘻何我三臺貞烈之盛也是非國家教化涵濡者遠烏足致此迺備綵輿冠服鼓樂鹵簿命其父母與壻家卜吉送女歸壻家以木主成親迎禮時同治庚午三月十二日

也禮成與烈女王滿貞事聯綴紀之將以不可得之於王滿貞而得之於貞女也故例守節三十年而後得請旌表然彈指間耳予且含毫濡墨以待之而并系以贊其詞曰君子之道造端夫婦故夫婦爲人倫始坤之文言曰地道也妻道也其可一不可二君臣夫婦一也微箕比干各行其志仲尼稱之曰仁王滿貞樊雪英者爲殉爲守一而不二貞歟烈歟仁歟君子之道歟嗚呼可以風矣

〔四川按察使牛樹梅題貞烈合傳〕余讀王烈女樊貞女傳不禁淚涔涔數行下也烈女未嫁殉夫奇矣殉夫而血迹飛越於十里之外則奇而幻矣要之非幻也人之血隨氣氣隨神彼其神與氣固早在戴氏子柩前而血亦隨之而去此亦銅山西崩洛鐘東應之理也而又何幻哉憶咸豐初兒琦甫及冠以療疾卒媳劉氏賢且孝侍疾逾半載形神俱



瘁夫亡之前一夕以索繞頸直兩手自勒一健婦瞥見之奔而解其手不得曲其臂不得移時索緩噴鮮血兩口坐而斃血有滷氣知先已飲之矣感烈女血異未嘗不痛觸前事也至過門守貞余聞善錄中亦采有十餘人每歎蜀中節義之盛讀樊貞女傳尤語語有生氣起人哀敬樊女俠能刼其父母以必從余轉惜王女之不樊若也若則或可以不死然余亦癡矣金完玉碎豈判重輕哉嗚呼天地間瑰節奇行乃往往見於閨閫間豈彼蒼生人固絀於鬚眉而優於巾幗與抑特生此巾幗者流以勵鬚眉與是未可知也介卿大令既與偉臣學博以盛禮成之於前復以大筆表之於後至於長言詠歎而若不能以自已並將徵詩於賢士大夫以益廣其傳嗚呼斯亦勤懇之至矣所以輔民彝翊世教而贊我國作新之化者實於是乎在乃濡筆而爲之序

〔馮大中烈女行〕王家有女貞且淑荳蔻香清蘭蕙馥旭日將開並蒂花秋風忽斷交枝木一朝青鳥信飛來哭煞蛾眉眼未開淚盈薛女湘紋篋愁鎖溫郎玉鏡臺竟日悲啼氣如噎阿母慙慙重慰藉爲言珍重女兒身行將再覓雍家璧女聞俯首涕如雨愁垂海棠扶不起俄聆玉樹欲長埋願服緇麻赴蒿里阿母聞言笑女癡阿爺執意更相訾等閒深鎖東風院不放梨花帶兩枝解顏破涕強爲喜當窗重把舊妝理黃昏燕酒奉高堂琥珀尊中浮綠蟻夜深人靜重門錮孤鸞星照黃泉路三尺青鋒竹葉刀劃絲劈開珊瑚樹燭淚熒熒影欲昏亭亭倩女已離魂一腔熱血無流處飛作桃花過堦村素帷深處聲如裂堦家衆客皆驚絕挑燈起視畫堂中鮮痕滿地猩紅結衆客驚疑渾不省天明消息傳俄頃始識完貞殉節精父老奔馳告太尹太尹聞之驚且悲碧油星



駕五雲雕停車爲合鴛鴦塚擲管親題墮淚碑清溪南去茂陵頭鬱鬱  
空埋土一邱香殘杜若秋光冷寒到梅花夜月愁冤含精衛何時滅貞  
心應向天涯說魂逐東風化子規三月聲中啼斷血

黃氏女 幼許字同里何天貴爲室天貴流蕩二十餘年不歸父文進欲  
另爲擇配女矢志不從遂自經死

〔譚安裕貞烈黃氏神道碑銘〕按蜀志所載治中歷代烈女若晉之李  
秀父領寧州刺史值夷變憂卒衆推繼職勵將士出計拒夷而州圍以  
解他若明之二錢氏劉賽姑萬吳氏輩以一時勢處其變捐生赴義視  
死如歸或投涪斷手或代姑殞生凜凜貞烈史策榮之視世之幸生惡  
死甘蹈汗穢者殆不可同年語也治南黃氏初居楚之寶慶府世次相  
傳未甚顯耀父諱榮母夏氏自康熙年間徙蜀後遷天臺山陳翰遠業

內佃蔬圃於景福院之西岸耐貧食力恬淡自甘生二男二女女長男  
幼母隨物化男女俱哀毀成禮雖成人猶愧弗及氏行居長後服闋榮  
卽許聘同里之何族何因出外遊蕩廿餘年未知存歿氏年屆笄何父  
母已許另行擇配氏婉言對父曰吾幼時許聘何郎無緣廟見今母死  
父存弟妹俱幼家貧無人供膳願周旋膝下從父而終再勿議及適人  
平居屢出至性語榮亦不料其矢志之果不可破也每日祇治圃營膳  
爲急閨闈肅穆無事足不及門雖父母族再三迎邀不肯一往族人悅  
其貞靜亦素知其不願奉人箕帚至乾隆癸卯榮以衰齡旣迫不令氏  
知許聘他族於親迎之前一夕卽閉門自經次早家人方覺俟衆排闥  
擁救已無及矣計自幼至永訣時氏已三十二歲榮方悔其強奪氏志  
深自引咎遇邑侯鄭素勵風教訊實詳准各憲轉以其事上聞旋蒙著



令設主祀祠建坊旌表復蒙制臺李以冰雪同清匾額輝耀門庭嗚呼氏雖身死不大有光於泉壤也哉竊爲國家化民成俗不外忠孝節烈禮義廉恥涵濡既久習與性成雖國中處女咸知守貞潔以全孝至於死而不悔繼古名媛芳躅而無愧媿美者今於黃氏見之也謹備述其懿行居里表於當路雖黃氏不藉是以傳亦以存深山碑碣中足徵之文獻云銘曰溫潤潔璧慄冽清霜天臺屹立鄴水流長生焉聚秀沒也垂光

李三姑 庠生李聯泮女幼聰慧舉止端重從父讀書頗諳經史初許字萬某萬家中落聯泮欲悔婚其子敦耳復聽鄰婦謀竊三姑婚書將別許富室三姑覺詬敦耳耳反辱詈之是夜三姑嚴妝訖自刎死

田姑 田穀女幼字袁氏未嫁隨母避難猝遇賊脅之行女給曰我渴甚

### 三台縣志

#### 卷十一

二十四

三台新民印刷公司代印

思飲從容赴河干大聲罵賊投水死

劉姑 劉宗賢女教匪猝至見其美欲污之隨母躍入河中死

龍橋女子 不知何許人嘉慶五年教匪犯境男婦死龍橋溪者百餘計賊退邑人馮翼臣督鄉人出其屍掘地理之去橋稍遠一石立溪心面與水平石邊芎繞如髮隱約莫辨疑亦屍往視之果一女子年可十七八蜷脰抱石死笑貌宛然弓鞋膝幅與褲衣交脛處紉以線身半裳服聯絡如之衆咸知爲貞烈感歎悲惋有泣且拜者因具棺別葬題其墓曰龍橋女子庠生朱承獻爲文豎碑路側以彰同治中知縣王宮午復申壘禁表曰貞烈女子之墓

〔按〕龍橋在縣南望川山下與蓬溪縣界毗連故蓬溪志亦載此事〔又按〕女子姓楊名玉貞德陽縣人楊應春女光緒癸巳夏示化於安



縣周渭濱始述其履歷甚詳言初爲教匪所掠獻其魁悅之女給請擇日且曰非是則有死不從賊益憐之弗忍強女恐終不免夜以繡線密綻其上下服次日乘馬至橋見溪水清深遂從馬上躍入以沒事頗靈異土人神之爲之立祠顏曰貞烈并祀中江劉二姑

獅山丐女 年及笄不知從何而來或曰童養媳見逐惡姑者行乞憩山下有強丐將脅汚之女懼難免以計脫尋自經死時值隆暑越三日面如生知縣陳某往驗異之廉得其實置強丐於法以其事上聞得旌川臬牛樹梅有龍橋獅山二烈女傳獅山在龍橋迤西相距數十里

丁霓英 庠生丁鶴鳴女咸豐十一年滇逆由潼竄緜道經其家霓英投井其母氏周嫂氏劉相繼投入賊憐之出其三屍周劉皆復活避居山砦衆因斂霓英於山下葬之

### 三台縣志

#### 卷十一

二十五

三台新民印刷公司代印

廖大姑 廖明岱女滇逆經青皮嘴掠其家欲汚之不從見殺以屍投於江

黃氏二女 邑北黃大容女名甲招黃大寬女名丙英遇賊同赴水死

〔陳謙詩〕寨內忽傳寨門破各柵婦女魂欲墮賊爲驅逐並下山散處偏隅更獲甌黃家不幸室有女姊妹花枝是連理三面賊來何處逃羔豚焉避豺狼取事急矣可若何色慘淡淚滂沱門前橫大河願辭阿母去聯袂赴青波母立喚女女不歸號咷大痛涕沾扉

南思壩二女 傳者失其姓氏爲賊所擄不從賊殺而投之江

〔陳謙詩〕嗚聲於邑悲不已賊擄垂鬢有四女其二從賊失所終其二就死甘如薺吁嗟乎世間婦女豈甘受賊辱旣俘欲死從何脫柔腸一寸苦難割文姬遂就左賢縛二女何能干賊怒明哲保身定有故竟將



潔白報天親鬻切肢分奮不顧可惜生捐名未存貞烈何人表墓門會  
當椒酒奠芳蓀南思剪紙弔雙魂

姜大姑邑北姜李幼女李志衛孤姑幼失怙恃養於尹氏女尹占上四  
女俱同治二年為賊所獲大罵不屈死

潘玉貞潘大何氏女何文一人俱賊至見逼懼辱自經死

張四英 邑北張國書女年十七許字譚氏賊至投水死

尹玉貞 邑北歐家口人幼許字龍得海次子光宇同治二年女年十七  
與叔母李携幼子避賊涪江東岸突遇賊脅之不從砍其腦傷耳欲墜  
旋掖女上馬女奮躍下馬逸不得止賊逐取馬女及叔母皆免後歸龍  
氏以賢孝聞

趙氏二女邑北趙廷易翠英易正宋東姑宋榮李淑貞李開  
趙廷芳女名滿易正宋東姑宋榮李淑貞李開

三台縣志

卷十一

丁幼女丁洪萬銀女鵬超上七人均同治二年遭藍逆亂懼辱投涪  
義女萬銀女鵬超上七人均同治二年遭藍逆亂懼辱投涪

江死

周女子 邑民田棕貴逼姦不從被勒死道光初旌表

王氏 王利映女幼字資明和為童養媳未婚光緒二十二年夫族兄資  
明珍偪姦力拒不從羞憤自刎死姑鳴於官知縣楊德鏢訊驗得實匾  
其門曰貞烈之門二十三年署知縣孫紹龍將明珍擬流王捐軀明志  
貞烈可嘉隨案附請旌表

文氏二烈女 張月鄉文鍾國女長曰香娃年廿歲次日滿姑年十二歲  
同治壬戌李逆由潼往縣路過宅邊二女倉猝逃至本境東河邊前途  
阻兵遂轉而東渡賊追甚窘二女投江死之並新府志

羅雪貞 尾火鄉羅教順女幼字梁氏會有戲謔者語侵雪貞堦不察竟



不欲婚女聞之羞憤死人咸冤之爲請旌表

王烈女 同治庚申藍逆竄境女年十七與母同行過懷安山脚遇賊欲姦之女怒罵不從賊殺之鄉紳卽其處爲女豎碑高五尺許人呼女兒碑

烈婦

後漢

相烏袁福 [華陽國志]相烏德陽人袁稚妻也十五適稚二十稚亡無子父母欲改嫁之便自殺袁福亦德陽人王上妻也有二子上以喪親過袁死福哀感終身父母欲改嫁乃自殺讚曰相烏袁福義不存生

常元常 [華陽國志]常元常江原人廣都令常良女適廣漢便敬賓早亡無子養賓族子父母欲嫁乃祝刀誓志而死常仲山女靡常適成都

三台縣志

卷十一

二十七

三台新民印刷公司代印

殷仲孫讚曰二常亮亮類構再隆

張昭儀 [華陽國志]張昭儀新繁人廣漢朱淑賢妻也賢爲郡督郵建安十九年劉主圍劉璋於成都賢坐謀外降誅璋以昭儀配兵將見逼昭儀自殺三軍莫不哀歎讚曰昭儀殉身

明

張氏 [舊通志]王以衡妻張氏潼川州人以衡將死張舉首觸地泣謂曰君必不起我先死待君於地下是夜自縊救免衡死張勺水不入口旬日亦死時年十七

張氏 [二統志]庠生岳庭鳳妻張氏潼川州人被賊執大罵不從遂遇害事聞旌表

謝氏 [二統志]王某妻謝氏潼川州人夫卒謝年二十舅姑利其改適



將強奪之峻拒不聽後知勢不可爭乃以衣服分給於衆夜扃戶自縊  
事聞旌表

朱氏 〔一統志〕朱氏潼川州貢生楊先憲妻崇禎甲申流賊執之不從  
被殺〔蜀碧〕賊取朱氏首去先憲刻木首附屍葬之

黃氏 〔舊府志〕黃氏潼川州舉人文麟女歐侍御次子如虹妻流賊據  
潼被執罵不絕口賊怒殺之

吳氏 〔舊通志〕吳氏潼川州進士李爲鼎妻聞賊至恐見辱遂自縊

謝氏 〔通志〕謝氏潼川州舉人李昌齡妻獻賊屠城謝與昌齡同逃至  
河岸賊逼泣謂齡曰君急自保勿以妾爲念遂投水死

舊府志  
作莫氏

吳氏 〔一統志〕吳氏潼川州舉人萬谷陽妻

〔一經堂萬夫人吳氏殉難事畧〕氏生少余四歲年十七以天啟六年

丙寅歸于余月餘嘗與余着棋子吾母亦從旁觀之繼而謂之曰汝出  
讀書人家豈與丈夫着棋乎氏大愧遂終身不復着雖善女工未習男  
履吾母曰豈有婦不爲夫履者返于母家數日歸以余履一雙呈於吾  
母吾母喜焉寡嫂方氏凡事多責備含忍事之不敢與抗也吾母間有  
不悅者于吾母房中長跪候吾母悅乃起辛未年秋吾母脇下有瘡恙  
爲之吮咀出于至誠毫無難色丙子秋余得售報初至無競容是年冬  
余適公車顏色慘淡大異往日離別及余在外二十一年歸吾女自雲  
南來爲余言曰自壬午老父離家母卽患寒疾幾不起癸未春奉祖母  
携我與寶成弟居祖莊甲戌獻賊據州拘紳衿家口入城初以二婢飾  
祖母與我母隔簾聽點事露賊令嚴拘祖母欲往我母曰豈有令祖母  
復往耶吾兒女隨祖母鄉居願隻身入城耳生死惟命勿致驚我高堂



與我幼子女足矣先是一日與剃頭撫之曰汝髮只剃此一次我不能再爲汝剃矣次日往州悲泣不勝送者消魂子女牽衣旣而毅然登輿城居猶省日用以祖所寄之需爲我製金珠簪珥履十雙令纏足乙酉十月二十三賊屠城或傳與鄰右張生員之妻李氏同藏土穴或傳出城外伏草中祖母遣人探視屍橫城野無從覓葬吾女所言如此痛哉我夫婦十七年生四女五男存一男寶成以荒劫死存一女姑姑今又出家矣居室之間甚相得及冬予將行謂予曰此去官我當在家不赴任也回憶此言以爲永訣痛哉我妻萬歷三十八年庚戌某月日生以明乙酉年十月二十三日申時殉屠城之難而死康熙七年戊申十二月二十日招魂葬于本州西門蟠龍山祖莊之左先是修通省志州守汪公已載殉難事入烈女云今並載入四川通省志

三台縣志

卷十一

二十九 三台新民印刷公司代印

清

唐氏 邑庠生董叙妻二十歲于歸勤婦職事翁姑如禮夫婦莊敬如賓初叙從中江進士林愈蕃學有文名乾隆壬午遊庠癸未旋天氏無子痛哭數絕家人百方譬解志不可移遂閉戶自縊時年二十六與叙合葬焉林愈蕃湖南鄱縣事聞之弔以詩

〔林愈蕃詩〕自從分袂隔關河執手無由淚轉多方幸芹宮初聽賦那期蒿里遽興歌忠勤儘可醫澆俗時命偏能惹病魔墓上卽今封宿草他年何處哭山阿 茫茫修短孰能同迴首悲歡一瞬中送我長途神欲往哭君遠地夢難通有妻就穴風斯烈無子傳家命亦窮商訂文章今在否九泉應恨蠹書蟲

張氏 敬華選妻夫歿父母欲奪其志更許丁某將嫁投水死



秦氏 王澤桓妻夫亡絕粒七日以殉道光二十一年經川督題請建坊得旨旌表

馬氏 陳光奎妻年二十四夫故痛泣不止投水死

羊氏 羊開道女袁訓述妻夫歿慟不欲生於出殯日泣請舅姑為夫立後旋絕粒七日潛飲藥死

徐氏 武舉趙維鼎繼室夫歿家貧翁姑令之改適不從割髮自誓旋恐見逼不食卒年二十四

于氏 王步綵妻于歸後翁歿步綵遊蕩耗家于泣諫不悛復欲鬻妻以償賭債于聞議值遂自經死

李氏 歐陽榮槐妻年二十餘遭教匪之亂與姑同避瓦窰中賊至俱被執欲汙之李給曰釋吾姑乃從命賊遂縱姑去李復厲罵為賊所殺葬

三台縣志 卷十一 三十 三台新民印刷公司代印

縣西豹子灣

郭氏 馬德偉妻演逆至侍老姑不忍避賊入獲其老幼將兵之郭向賊哀求賊乃釋脅與行甫數里撲水死生母鄒氏郭玉妻亦同時罵賊遇害

〔陳謙詩〕東方紅日未昇東沿山戰鼓聲瑟瑟鳳凰山寨須臾破血水濺山山為紅近城爰有馬氏孀被圍求死無死處瞥見山塘水半坳是卽我今歸葬路塘水之深不及肘露頂此身非我有以首濡水強沒之賊來拯時空垂手搜求更向別家走

賴氏 古坤秀妻演逆至家欲脅汚之賴哀言夫病重送藥服後卽當允從賊信之賴上樓閉門自縊死

于氏 庠生廖靜軒媳新寡有二子一女聞賊犯境以長子屬夫弟曰翁



姑老邁失明賊至或不加害男子少壯當不免叔速携此子俱逃庶可存宗祀也未幾賊果至于携幼子及女赴水死

張氏 王汝榮妻年二十餘負子隨夫避滇逆亂至涪江遇賊虜其舅與夫誘婦曰從我不殺汝張請釋舅與夫而後可賊釋之俟遠去厲聲罵賊負子投江死

謝氏 邑東高山舖謝大隆姪媳咸豐辛酉遇賊赴水死

〔陳謙詩〕邑東高山舖厥有細民謝氏婦夫亡遺一兒呱呱在襁負解一青年伶仃家無聊賴矢心撫孤心無外忽傳有賊來倉皇急上寨解二賊破寨時日欲落土老者押送糧少者俱執擄一切婦女復何之暫回家裏處各恐兒饑將兒乳解三賊逐何踰踰里復踰牆突見乳兒者驅迫使下堂曰去不汝傷軍中孀子需奶孀解四婦見賊勢漸將及我死緩須

三台縣志

卷十一

三十一

三台新民印刷公司代印

史卽大不可側有湫井爰得我所將兒付諸姑就死甘如荼解五吁嗟乎此特愚婦耳豈冀榮名身後邀惟知大節無所逃完卵居然出覆巢行人共指高山高解六

陳氏 王從仁妻邑人陳紹岷女避賊於沙磧賊至恐受污不及釋兒母子同赴水死

〔陳謙詩〕涪江之水駛且清中岩沙磧足坦平土人恃如此天堑絡繹奔馳往避兵賊於平流橫盪漿豈汝能往我難往沿江但見龍鼉遊解七女均作魚肉想短刀懷挾登彼岸白壁肯受青蠅玷携兒負女蹈急湍上下浮沈尸一片無情江水日悠悠愁雲凝水水不流信有貞魂淘不盡巴陵瀨水共千秋

郭氏 張炳坤妻幼讀書識字事姑孝同治癸亥二月賴逆竄至縣北葫



蘆溪郭掖老姑急避賊向姑索金不得刃其顛郭衛姑厲罵賊殺之次日賊走炳坤尋母見妻抱母臥趨救之妻斷吭死母血流被面氣絲絲不絕昇歸得甦母大慟曰媳爲我死何忍遽離以已棺斂之月餘乃葬吳氏 蘆溪仲元斗妻元斗不務正業吳每泣諫不聽一日夫出未歸吳獨居突被殺死明晨羣視但見血流滿地身有刀傷痕十餘知爲拒姦無疑六日始斂斂時忽兩眼流淚口中噴血戚族微弱無有爲白其冤者聞者恨之

張氏 陳廣道妻 左氏 陳天高妻 王氏 陳道順妻陳氏一門死難者男女共十三人 敬氏 王正和妻 陳氏 王作灌妻  
賴氏 王作順妻 王氏 賴懷安妻 楊氏 任開榜妻 賴氏 王作典妻 趙氏 霍世來妻 于氏 何文級妻 卓氏 賴應珠妻 王氏 賴春陽妻 陳氏 林登進妻 陳氏 訓德友妻 韓氏 謝洪妻 黃氏 馮春吉妻 鄧氏 袁正倫妻 以上均咸豐十一年遭滇匪之難懼辱自投水死

三台縣志

卷十一

三十一

三台新民印刷公司代印

蔣氏 陳玉清妻 羅氏 姜有義妻 林氏 藍有材妻 袁氏 周永全妻 李氏 曾懷義妻 陳氏 李仁元妻 胡氏

田德玉妻 稅氏 胡興發妻 黃氏 胡玉田妻 以上均同治二年藍逆至葫蘆溪被獲罵

賊遇害

張氏 李春茂妻 胡氏 李萬齡妻 達氏 張永泰妻 羅氏 李開盛妻 杜氏 劉玉星妻 以上均同治二

年遭藍逆亂懼辱投涪江死 併新志

鍾氏 邑人羅夢九妻羅貿易出有近鄰張某者土豪也慕氏色乘間逼之不從忿甚即投河斃乾隆三十五年旌表前太守沈清任有文鐫於坊額

賴氏 邑人馬榮俸之妻其族人馬雲希素無賴值榮俸出欲汚氏忽持刀入室脅以不從則死氏力拒之厲聲喊罵雲希知事不諧持刀殺之乾隆四十九年奉旨旌表



熊氏 邑人文典之女適某姓遭強暴欲犯之投縵救免繼復然乃死嘉慶中旌表

王氏 處士陳洪才妻嘉慶五年教匪渡涪江避入山中後聞賊西去携三子一女將還家適制府勒公參贊德公大兵追剿賊敗逃返渡涪水驟如蜂至氏猝遇度不能免謂十一齡長子德榮曰汝速逃以延陳氏我與姊及弟皆死於是矣其女年十五氏以帶縛其足先投於河後與幼子同赴水死德榮痛亦隨母躍入漂流數里遇救復甦一門四口同時死難其志可嘉而其事可哀矣

任氏 處士任本顯之女邑人黃某妻嘉慶庚申年教匪犯潼川脇氏去氏罵曰吾士族女豈從汝苟活遂投水死數日賊退家人獲其屍顏色不變凜凜有生氣 併舊縣志

三台縣志

卷十一

三十三

三台新民印刷公司代印

卓氏 邑東賴某妻因藍逆屯營毛狗寨賴某被匪拉去氏見往阻匪見氏色美殺賴某欲污氏氏不從跳糞池中淹死

尹氏 龍光字妻貢生尹亮臣孫女咸豐十三年藍賊擾境途遇賊逼與同行不從賊怒斫之暈絕於道賊去遇救得甦賊平由縣彙詳旌表其門

周氏 古文琳妻同治壬戌髮逆突至氏恐難免投涪江死鄉人設主於普救寺祀焉

〔邑庠生熊其光挽詩〕君不見渤海校書口口口奮袂罵賊殞其身又不見禮修被俘碧塗面意氣生然色不變一生一死足千古豈獨光彩增門戶地維以立天柱尊其餘粉黛皆泥土賢哉古母出清門愛蓮家近風道學存德言容工素嫻習况復性天惠且溫筆公有裔安邱壑家近



山城依水郭覓將玉杵結姻盟一縷紅絲牽繡幕從此鴛鴦不分飛花  
晨月夕永相依階前玉樹三株秀砌下芳蘭兩色菲一朝髮匪冲西來  
勢如奔電吼如雷風聲鶴唳皆爲賊男女爭逃涪水隈可憐舟中指盈  
掬妖風斷後競奔逐少婦俘餘脅老姬地慘天愁草木悲母獨從容沉  
江底就義捐生同敝屣蛟龍潛伏魚蝦藏顏色依稀猶帶喜瓣香崇祀  
爐煙殘壠上仙雲護小巒回首蘆溪江畔月長與清風徹夜寒

于氏 住近仙人井廖明善妻年三十一夫亡咸豐辛酉藍賊擾境氏出  
遠避忽途遇賊來氏遂轉身投涪歿

陳氏 王价人之元配藍逆犯境氏奉姑逃避途遇賊勢難兩全赴江死  
年三十九時駱文忠爲川督得詳請旌奉旨准入祠建坊

賴氏 王作順妻年二十餘遭藍逆之亂氏避藏麥地中爲賊所瞭勢迫

三台縣志

卷十一

三十四

三台新民印刷公司代印

知不免因匍匐赴江以死

羅氏 王際玉妻于歸未幾際玉隨父之雲南又他往三年不歸譌傳玉  
死父歸告氏痛幾絕翁見氏年幼無子欲改嫁氏乘夜密縊房中後年  
餘際玉歸家而氏已死

任氏 邑南室火鄉高昌炳妻于歸後久不育年三十尙無子既見夫兄  
生子興基竊喜欲撫之離乳後引同寢處親自鞠育視如己出至四歲  
求立撫券夫兄謂再舉時另撫時光緒三十三年夫卒氏請於夫兄又  
不許氏曰夫死無後何生爲彼不肯以子後我者以冢子且慧不忍割  
愛耳事至今日吾將以死要之夫兄以新寡悲憤之言強慰之實不願  
撫氏乃入房服毒死距夫死僅逾三時次晨餐呼不應往救已無及矣  
夫兄悔卽柩前撫興基爲嗣以慰幽靈



劉氏 王治光妻嘉慶庚申三月王三槐擾境全家遇害氏被賊逼投大頭堰溺死時二十八歲胞兄劉學仕收屍掩土至秋九月改葬面如生徐氏 民國十年六月江防軍紮觀音橋沿途人家奔避殆盡湘江橋蕭惠之訓蒙爲業率子遠逃妻徐氏疑夫與子被兵拉去遍尋不得消息乃負衣服上山覓徑且走且號夜聞軍聲四起恐不免遂自縊於荒谷兵去蕭始收葬